



Senin, 10 April 2023

Ogen: Hosea 14:9



Dalan Kalak Bujur



Bujur ertina lurus, pinter, la nimpang ku kawes entah ku kemuhen. Erdakan i bas bujur, ertina la melala ietehna langkah, kai situhuna e saja belaskenna, la ia nggit ipengaruhi si kawes ras kemuhenna.

I bas renungenta e isingetken kalak pentar, e me kalak si megiken perkatan Dibata, janah kata Dibata e itamakenna i bas pusuhna, la sekli pe ilupakenna. Kata e lanai terbuat i bas ia nari, enggo terpatri ras enggo mendarah daging ras kulana. Teridah arah ia ndalanken kata Dibata e i bas geluhna si teptep wari. Jadi, kalak pentar lanai sitik pe ia nggit nilah arah dalin Dibata. Kalak pentar e me ikataken kalak bujur.

Dalin Dibata e pinter kap, la lit kata la tuhu i bas IA. Adi nina Ku sampati ras Ku selamatkan bangsaKu, pasti idalankenNa. La lit janji si pernah ibelaskenNa la itepatiNa. Bangsa Israel ikepkepNa, itami-tamiNa, ibabaiNa arah dalam si senang. Tupung bangsa e nilah arah IA nari, labo minter itadingkenNa, tapi ibabaiNa ka mulih man baNa. Kebujuren Dibata tangkas i bas keleng ateNa, ialemina bangsaNa amin piga-piga kali erbahan jahat man baNA. Ipasu-pasuNa kegeluhen bangsa e, ibahanNa bagi batang saitun, erbulung meratah, ertunas, erbunga seh erbuah. Erguna kerina geluhna seh banci itandai kalak ia mulihkan ras mehamat kalak man bana.

Kalak bujur arus natap kempak dalin Dibata. Biak Dibata e lit i bas ia, icidahkenna arah moral si mehuli, lagu langkah si la man pandangan. Dem i bas ia kekelengen, nggit ngalemi salah di kune rusur ibahan kalak si la ngena atena. Meriah akapna di kune kalak ndatken pasu-pasu. Erlajar ia tetap ndalanken kata Dibata i bas kerina dampar geluhna, Dibata inganna cicio di kune lit perbebenna si mberat, ku Dibata ia ngadu di kune lit getem pusuhna. Dibata lalap bahanna temanna kune ku ja pa pe perdalanna. La ia nggit sitik pe sirang ras Dibata.